

22/02/2001

Muhammad cabar Azmin sumpah di masjid

KUALA LUMPUR, Rabu - Naib Presiden Umno, Tan Sri Muhammad Muhd Taib mencabar Ketua Perhubungan Keadilan Selangor, Azmin Ali, untuk bersamanya bersumpah di dalam masjid bagi menafikan kenyataan mengenai isu kononnya mereka ada berbincang mengenai politik di depan Kaabah, baru-baru ini.

"Saya bersedia bersemuka dengan Azmin bagi membuktikan kenyataannya itu adalah pembohongan. Saya juga meminta Azmin mengiringi saya untuk bersumpah dalam masjid terhadap kenyataan yang sengaja direka.

"Ini adalah soal agama. Dia tidak sepatutnya menggunakan Kaabah sebagai alat untuk melakukan pembohongan. Saya hanya bertemunya di Madinah tetapi tidak pernah berbincang mengenai isu berkaitan politik," katanya dalam kenyataan di sini, hari ini.

Sebelum ini, Azmin yang juga Ahli Dewan Undangan Negeri Hulu Kelang, membuat dakwaan bertemu dengan Muhammad yang didakwa memburuk-burukkan kerajaan dan Perdana Menteri, Datuk Seri Dr Mahathir Mohamad di depan Kaabah.

Beliau berkata, perbuatan memutarbelitkan fakta dan pertemuan di Tanah Suci itu tidak sepatutnya timbul sekiranya seseorang itu mengaku Islam.

Katanya, beliau tidak pernah berjumpa Azmin di depan Kaabah dan membincangkan isu politik, termasuk perihal Dr Mahathir.

Muhammad berkata, beliau juga tahu Azmin masih lagi menyebarkan dakwah palsu mengaitkan pertemuan itu dalam siri ceramah politiknya selain menerusi laman web pembangkang.

Sehubungan itu, Muhammad meminta Azmin memberhentikan segera perbuatan yang bermotif jahat itu kerana ia bukan saja satu pembohongan malah jelas menjadi larangan dalam Islam.

"Saya tidak tahu tujuan sebenar dia (Azmin) berkata demikian tetapi yang jelas dia berniat jahat. Dengan itu, sepatutnya dia berani untuk tampil dan bersumpah dalam masjid.

"Saya ingin memberi peringatan kepadanya supaya tidak mempermainkan agama demi kepentingan agendanya sendiri kerana padahnya amat buruk," katanya.

(END)